

1 PITA PITA PILIWUKNA TATA LI^GA PAS

¹ Wun Pita wun. Wunayi lavu nyingamba piliwuka. Wun Jisas Kraistna njivwa kwutiga nyan wun. Ngwuk Godna nimba ngwuk. Ngwuk kat kan pas wun piliwutigowun. Ngwuk tingwa ngepma kwagalalaa ngwpma ngwpma yilaa yetiliga nimba ngwuk. Ngwuk Pontas, galesia, Kapadosia, Esia, Bitinia walinja ngepma ngepmamba yetiligangwuk. ² God ndina yelavik vapmba yelavitaa ngwuk kat ndina mbaapmamba taagandi. Godnana waagan ngwuk kat kupi maawupmba kwindangat taagandi. Ngwuk Jisas Kraist waa nyaangit wukngwangat taagandi. Jisas Kraistna yelogwenmba ngwutna kavle vak kat siliimbwindangat taagandi. God nin kat miwa yiga linda vak aywaa viga lingwangat walaa wowun. God klangwangat wowun.

NYINANGWUTNAT WULEILAA APMA WENGA KALIGANIN

³ Nina njambwi nyan Jisas Kraistna nyaek God ndi kat sivu kigiyinan. Nin kat miwa yilaa wandi maa Jisas Kraist ngega yandi. Kiyalaan lindi maa God ndi kat wandi, wasagla laatndi. Laatnda vak vla nino kiyalaan ngini wupma laakiyanin waa yelavitanin. Apma vatna. Ngini laatneya apma vak kat yelavika apma vat yetigianin. ⁴ Yelavika liga God ndina nimba katkwindeya apma nda klavat nino yelavika tiganin. Wan kwindeya nda

nyinangwupmba yisoga taagandi, tigandi. Nyinangwupmba liga ana kavle yigiyandi. Kwo ligiyandi. ⁵ Wan taagandi, tiga nda ngwutna nda liga. God kat maawupmba yelavika kwutaa ligangwuk. Ngi kat tiga ndina kwondumba ngwuk kat viga ligandi. Ngwuk ana kavle yigiyangwuk. Apma vat tigiyangwuk. Ngini yaiga nandinya kat God nin kat kwunatndeya vak kat kawiga ligangwuk.

⁶ Ngini klangweya vak kat yelavita solat siga ali ngwula. Mbambala nima sakwat kavle vatna yaliga ngwuk kat. Ke vaakngwa. Ngini yaiga apma vak kat mina yelavika ali ngwula.

⁷ Kavle vat ngwuk kat yandi maa vilaa waigandi. God kat yelavika maawupmba kwutaa linja vat kwagala kiyandi? O. Ana kwagala kiyandi waa waigandi. Gol walinja kapa wupma ligandi. Gol klalaa yamba taagandi. Taagandi, ndina kavle nda ngilindi, apma nda mina tigiyandi. Gol ngini ngiligiayandi. God maawupmba yelavika kwuta lingwa vak ngini ana ngiligiayandi. God kat yelavika maawupmba kwutaa lingwa vak gol kat kwulatigandi. Kavle vat yandi, God kat kwagala lapman yingweyan ngini yaiga nandinya Jisas Kraist ngega yaiga nandinya god ngwuk kat vilaa ngwutna si kwutaawaga katsoga wigandi. Ndi apma nimba ndi waa ngwuk kat waigandi. ⁸⁻⁹ Ngwuk God kat woviyaguga tiga nimba ngwuk. Ndina mbangi mindama ana yingwuk. Vilapman tiga ndi kat woviyaguga likangwuk. Ndi kat vilapman maawupmba yelavika kwutaa tigangwuk. Kita nda viga ligangwuk. God kat maawupmbayelavika kwutaa

lingwuk maa ngwuk kat maawut kwunatinda vak viga ligangwuk. Vilaa nimamba solat siga tigangwuk. Solat silingwa vat kwundimba nat nimba kat ana alisiga mbutigangwuk.

¹⁰ Tamba la profet God ngini ngwula maawut kwunatndeya vak kat lavu nyingamba tamba piliwutndi. Wan vatnana angwa vak kat kwaka liga piliwutndi. ¹¹ Kraist kwiya waagan ndina maawuprmba wuleindi maa Kraist kat yaigakavle vak kat piliwutndi. Kavle vat yandi, wan vak kat kwulataa njambwi nyanat tigiyandi waa tamba piliwutndi. Kraist nin kat kwunapmat tinda vak aywaa ana viga lindi. Anda njimbla nina maawut kwunakiyandi waa wagala lindi. Anda vapmba nin kat kwunakiyandi waa wagala lindi. Wan tamba piliwutnja vak mbambala kak kiyandi, vinin. ¹² Kan tamba la profet God ndi kat yindeya vak kat ana piliwutndi. God ngwuk kat yindeya vak kat tamba piliwutndi. God ndi kat mbutnda nyaangit ana kak kiyaigandi. Tilina njimbla kan nyaangit piliwutina nyaangit ana kak kiyaigandi. Ana vigiyanin maa maawuprmba yelavitindi. Tamba piliwutinja nyaangit mbambala wuka ligangwuk. God wandi maa Godna waagan nyinangwuprmba liga ngega yalaa nat nimbara maawuprmba ngwandindi maa ndi ngwuk kat wupma wan apma nyaangit mbutindi. Wan nyaangitnana angwa nat ensel ndino vivat yelavika tigandi. Ana viga ligandi.

APMA VAPMBBA YETI NGWULA

¹³ Ngwuk apma vat savagu vapmba yelavika yeti ngwula. Kavle vak kat kai waa yeti ngwula.

Jisas Kraist ngega yaiga nandinya klangweya nda kat mina yelavika yeti ngwula. Nat nda kat ke yelvaika yetingwa. ¹⁴ Godna kwundi wuka yigumba ali ngwula. Tamba Godna nyaangit wutapman yetingwa vapmba mbambala wupma ke yetingwa. ¹⁵ Tamgana vak kwakalalaapma vat mina yeti ngwula. God ndi ngwuk kat yagwa waa nyana. Ndi apma vat mina yetiligandi. Kavle vat ana yetiligandi. Yetinda vla ngwulo wupma apma vat mina yeti ngwula. ¹⁶ God wandi, tamba la nimba ndi piliwutndi. God wandi. Apma vat yetuwa vla ngwulo wupma yeti ngwula waa wandi waa tamba piliwutndi.

*GOD NIN KAT KWUNAPMAK NIMA WENGA
VLA NIN KAT KWINDI*

¹⁷ Ngwuk God kat wagalangweya njimbla ninanyaekna waa ndi kat waligangwuk. Ndi nin kat viga simblan ana siga naguligandi. Kwutina njivwa vilaa siga naguligandi. Ngi kat tiga kan kipmamba linan God nin kwukiyanin. ¹⁸ Tamba yetingwa kavle vat ngwula ngwaak walangamba klalaa yetingwa kavle vatna. Ngwuk kat tiga God nima wenga kwindi maa wan kavle vat tamba ngilindi. Tamba viga ligangwuk. God kiiya wenga sanya kwanda vla ana ligandi. Wan kipmana nda ngiligiandy. Ndi apma wenga kwinda. kwinda wenga ana ngiligiandy. ¹⁹ Kwinda wenga kingiyan. Kraist nin kat tiga kiyandi. Ndi Kraist mbangi lumwin tapman tiga God kat kwinja sip sip vla lindi. Ndi kiyalaa ndina yelogwen ngwuk kat kwunatndi. ²⁰ Kan kipma God kwutapman tiga Kraist kat wandi. Ngini yiga ndi kat tiga kiyaigamin waa wandi. mbambala

God nin kat kwunapmak tinda vak tamba kak kiyandi. Mbambala nin kat tiga yandi, ak ndi kat viliganin. **21** Kraist ya vak kat wutaa God kat maawupmba yelavika kwutaa lingwuk. God wandi maa Kraist kiyalaa liga vasagla laatdi. Vasagla laataa njambwi nyanaat tindi. Laatndavak vilaa God nin kat wupma yigiyandi waa yelavika ligangwuk.

NGWULA KITA MBAAPMA NIMBA KAT NIMA MAAWUT YELAVIKA ALI NGWULA

22 Wan apma nyaangit wuka liga apma maawut klalaa apma vapmba yelavika yetiligangwuk. Yetiga liga ngwula kita mbaapma nimba kat nima maawut ndi kat yelavika yeti ngwula. Ndi kat nima maawut yelavika tiganin waa woseka ke wangwa. Ndi kat yelavika yeti ngwula. **23** Godna nyaangit njimbla njimbla tigiyandi. Ana ngiligiayandi. Wan Godna nyaangit wutaa tambana kavle vat kwagalalaa mandip kupi nyangu vla lingwuk. Kupi vat kwinda nyaangit njimbla njimbla tigiyaya nyaangitna. Kipmana nda aywaa ngilindeya vla ana ngiligiayandi. **24-25** Wan nyaangit kat tambala nimba ndino lavu nyngamba piliwutndi.

Ndinyangu avla watiga yuwi vla tigandi.

Kipmamba

liga ndinai kwukwa njivwa mwe vla tigandi.

Tiga

liga yuwi kiyandi, mwe kiyalaa ndaigandi.

Njambwi nyana nyaangit wupma ana ligandi.

Wan

nyaangit njimbla njimbla tigiyaya nyaangitna.

waa tamba piliwutndi.

2

NGWUK GODNA NMBA NGWUK

¹ Ngwuk kavle vak kwagala ngwula. Woseka ke wangwa. Mandip mandip nyaangit ngambunja vak ke kwukngwa. Nima sakwat kwanda kwanda liga nyan kat kai wanja vak ngwuk ke kwukngwa. Njika walinja vak ngwuk ke kwukngwa. ² Mat nyangu mwunya ngu kivak yelavika tigandi. yelavika tinja vla God waa nyaangit wupmat ngwutno wupma yelavika ali ngwula. Wan nyaangit wuka apma maawut yelavika apma vat tigiyangwuk. ³ Ndina nyaangit kilinja apma nda vla ligandi. Tamba la nimba ndino piliwutndi. “Njambwi nya nin kat yilinda apma vat kalalaa kingwuk” waa lavu nyingamba piliwutndi.

⁴ Njambwi nyan Jisasat yagwa ngwula. Ngwuk kat tagula vak tigya maawut kwigiya nyana. Ndi tagula vat tiga gambak vla ligandi. Ngay kwutaa nimba kan kambak kat vilaa kan kavle kambakna waa yaagindi. God wupma ana yindi. Wan kambak vilaa apma nglei kambakna waa wandi God. ⁵ Ngwulo apma vat tiga akbak vla ligangwuk. God kat yangwuk maa ngwuk kat kwutaa God-nana waagan tigiyaa ngay ngwutno ngwuk kat god kwagiyandi. Tamba God kat kwunapmat ta nimbara nyaangit god wutindi. Ngwutno wan God kwutnda ngay wuleilaa Jisas Kraistna si waga God kat mbukngweya nyaangit ndi wukiyandi. ⁶ God waa nyaangit wutaa tamba la nimba ndino kan kambak kat lavu nyingamba piliwutndi.

God wandi. Apma nglei kambak kalalaa ngay kwupmak

taagawun. Wan kambak kalalaa way ngemba liga
 kwaalik vla tindangat taagawun. Kwutuwa ngay
 Saion waa Juda walinja nimbanan nindimba kwutuwa
 ngaya. Kita nyan wan kambak kat vilaa ndina kwupmba yigiyowun wandeyan ngini ndi ana wup
 yigiyandi.

waa piliwutndi. ⁷ Tamba piliwutnja kambak apma kambakna. Wan kambak vla liga nyan kat maawupmba yelavika kwutaa lingweyan apma vat tigiyangwuk. Ndi kat kaiwaiga nimba ndi kavle yigiyandi. Ndi kat tamba lavu nyngamba piliwutndi.

Kambapmba ngay kwutaa nimba wan kambak kat vilaa kavle kambakna ana kalalaa yaagindi. Kavle kambak ana ndi. Apma kambakna. Ndi kavle vak yelavika tinjan kat tiga ndi klalaa yaagindi. Yaaginja kambak nat kambak kat aywaa kwulatigandi.

waa piliwutndi. ⁸ Nat tamba la nyan an kambak kat ndino lavu nyngamba wupma piliwutndi.

Nat nimba mamba viyalaan ndaigandi.

waa piliwutndi. Kambak mamba viyandi, ndaigandi waa piliwuta nimba ndi. Ngi kat tiga kavle yindi. Ndi God waa nyaangit wupmak kat kaiwala kavle yindi. Ndi God waa nyaangit wupmak kat kai wala kavle yindi. Kavle vak yilinja vak tamba God viiga lindi. ⁹ Ngwuk wupma ana

ligangwuk. Ngwuk God yagwa waa nimba ngwuk. Ngwuk apma vat yiga yetiliga mbaapma nimba ngwuk. Ngwuk Godna nimba ngwuk. Tamba kulun waa kavamba yetingwuk. God ngwuk kat yagwa ngwula waa wandi. Ngwuk kat yiwa apma vat yiga nat nimba kat ambuk ngwula waa wandi God. ¹⁰ Ngwuk tamba Godna nimba ana ngwuk. Mbambala tamba godna nimba ngwuk. Tamba God ndinyangu kat miwa yiga linda vat ngwuk ana viga lingwuk. Mbambala tamba viga ligangwuk.

NIN GODNA NJIVWA KWUTIغا NIMBA NIN

¹¹ Wuna ali nimba ngwuk. Kan kipma ngwutna ngepma ana ndi. Ngwuk kapma ngepma nimba ngwuk. Kan kipmamba yetingwa njimbla ngwula mbangi waiga vak kat ke wukngwa. Ngwula mbangimba liga vatno ngwula maawupmba liga vatno mandip mandip nda mbik. Awat sowat walealigabit. Ngwula mbangi kat mina yelavikngweyan ngwula maawut kavle yigiyandi. ¹² God kat kai wala nimbanana tingwa njimbla apma mina yelavika yeti ngwula. Wupma yingweyan ngwuk kat vilaa kavle vat yiga yetiga nimba ndi waa ana waigandi. Ngini God ngega yaiga nandinya yetingwa apma vak kat yelavita Godna si kwutaa katsogiyandi. ¹³ Kan kipmana njambwi nimbanayaangit ngwulo awuk ngwula. Nina njambwi nyan god ndino wupma yinangat wandi. Nina kipmana njambwi kingna nyaangit awuk ngwula. ¹⁴ Ndina kwupmba njambwi nimbanayaangitno awuk ngwula. Kipmana njambwi King wandi maa ndino tigandi.

Kavle nimba kat viyavat apma nimbanasi kwutaa katsovati tigandi. ¹⁵ God wupma yinangat nin kat wandi. Wupma yingweyan ngwuk kat kavle nyaangit ngambuga njika waliga nimba ndi ana nyaangit waigandi. Apma vat yiga yetingwa vak vilaa ndi nyaangit ana waigandi. ¹⁶ Njaambiya ngwuk kat ana viga ligandi. Njambiya lapman tiga kavle vat yiga yetigiyaniin waa ke yelavikngwa. Nat vak wagalala Godna njivwa mina akwuk ngwula. ¹⁷ Nat nimba kat ke kwusisiliga njika wangwa. Ngwula kita mbaapma nimba kat nima maawut yelavika ali ngwula. God waa nyaangit awuk ngwula. Nina kipmana njambwi kingna nyaangit awuk ngwula.

KRAISTNA MBANGI KANGIT YINDA VAK VLA NINA MBANGI KANGIT WUPMA YIGIYANDI

¹⁸ Ngwuk njivwa kwutiga nimba ngwula njambwi nyan ngwuk kat viga liga nyana kwundi awuk ngwula. Ndi kat kai waa ke wangwa. Apma vat tiga nyana kwundi kavle vat tiga nyana kwundio ndino awuk ngwula. ¹⁹ Apma vat yilingwuk, ngwuk kat viyanjeyan nimamba ke yelavikngwa. Ndi kat awat walea lapman yingwangat ngwuk kat God wandi. Ndi kat ana walea ligiyanin. God kai wandi waa yelavika yetingweyan God ngwuk kat apma wenga kwigiyandi. ²⁰ Kavle vat yilingwuk, ngwuk kat viyanjeyan apma wenga ana klaigangwuk. Apma vat yilingwuk, ngwuk kat kwo viyanjeyan apma wenga klaigangwuk Godnanamba. ²¹ Wupma yilingwangat God ngwuk kat ndina mbaapmamba taagandi. Kraist ndino ndi kat kwo viyandi. Vak yiga lindi, ana viyandi. Ndino yinda

vla ngwutno yigiyangwuk. ²² Ndi kavle vat ana yilindi. Apma vat mina yiga yetindi. Woseka ana walindi. ²³ Ndi kat njika wandi maa awat ndi kat ana njitindi. Ndi kat viyandi maa ngini awat ngwuk kat viyaigowun waa ana wandi. God wun kat yilinja kavle vak kat vilaasavagu vapmba siga nagugaliga ndi kat siigiyandi waa yelavika tindi. ²⁴ Kraist nin a kavle vak klalaa diwai krosmba kaalandi, kiyandi. Kiyandi, nin kat viga linda kavle vat ngilindi, apma vapmba yiga yetigiyani. Ndi kat viyaga sindi maa ndi nin kat kwunatndi. ²⁵ Nin tamba yambi siliwota sip sip vla linin. Mbambala sip sip yiga lan nyan kat lungwamataa yanin. Ndi nina maawut kat kwunaka nin kat viga lindi maa apma vat tigiyani.

3

NDU TAAGWANA NYAANGIT

¹ Ngwut taagwa ngwula lana kwupmba ligi ndina kwundi wuka ali ngwula. Ngwutna lan Godna nyaangit wupmak kat kai wandeyan apma vat yetingwa vak kat vilaa mandip maawupmba yelavika God waa nyaangit wukiyandi. God waa nyaangit awuk waa wangwa nyaangit ana wukiyandi. Apma vat yetingwa vak vilaa wukiyandi. ² Wuna taagwa apma vat yetiga wuna kwundi wuka ligali. God waa nyaangit wukiyowun waa waigandi. ³ Nima njivwa kwuka mbangi yelagaga yetingwangat kai wowun. Ngwula mbangi yelagavat apma waavwi ke kwusongwa. Ngwula nambuna nimbi nima njivwa kwuka ke yelagangwa. Nima njivwa kwuka nyo tamba ke ngwula mbangi yelagangwa.

⁴ Ngwula maawut apma vat tindayan ngwula mbangi kat ana nagigiyandi. Ngwula mbangimba yelagangweyan nda avit taagwa yingweyan anda vapmba ngini mbangi yelagagiyangwuk. Ngwula maawut apma vat tindayan avit taagwa tingweyan wan vak ana ngiligiyandi. Njika walapman apma maawut yelavika apma vapmba yetingweyan God ngwuk kat vilaa woviyaguga ligiyandi. Apma vat tiga maawut apma yelaga nda vla tigandi. ⁵ Tamba la taagwa God kat yelavika ta ndi taagwa ndino wupma yindi. Ndina apma maawut ndina yelaga nda vla tindi. Ndi ndina lana kwundi wuka ndina kwupmba tindi. ⁶ Ebrahimna taagwa Sara lilo wupma tili. Li Ebrahimna kwundi wuka ndi kat njambwi nyana waa wali. Ni'ma maawut yelavit tapman tiga Sala yeta vla apma vat yetingweyan ngwuk lila nyangu vla tigiyangwuk. ⁷ Ngwut ndu ngwula taagwa kat yelavik ngwula. Ndi ni'ma avo tiga vla ana ligandi. Ngi kat tiga ndi kat ni'ma maawut yelavika ndi kat kwunak ngwula. Ndina si ke tasandaga. God kwiya njimbala njimbla tignweya apma vat ngwuk kapma ana klaigangwuk. Ngwutna taagwa ndino klaigandi. Ndina si tasanda lapman yingweyan God kat wagalangweya nyaangit wukiyandi.

KITA MAAWUPMBA YELAVIKA YETI NGWULA

⁸ Ngini ngwuk kat piliwututuwa nyaangit kingiyan ndi. Kita maawupmba yelavika yeti ngwula. Ngwuk kita mbaapma nimba ngwuk. Ngi kat tiga awat sowat ni'ma maawupmba yelavika ali ngwula. Awat sowat apma vat

ay ngwula. Nat nyana si viyesandaalaa avla ngwutna si ke katsoga ngambungwa. ⁹ Kita nyan ngwuk kat kavle vat yindeyan awat ndi kat kavle vat ke yingwa. Ngwuk kat kavle nyaangit ngambundeyan awat ndi kat kavle nyaangit ke ngambungwa. Ndi kat apma vat ay ngwula. God nin kat yilinda vat apma vatna yilinda. Kavle vat ana ndi yilinda. God ngwuk kat yagwa ngwula waa walaa ngwuk kat apma vat yigiyowun waa wandi. ¹⁰ Tamba la nyan God waa nyaangit wutaa ndino lavu nyingamba piliwutndi.

Kan kipmamba tiga kita nyan apma vat solat sivat
wandeyan ndi kavle nyaangit kwagalalaa woseka
walinja vak kwagalagiyandi. ¹¹ Kavle vat kwagalalaa apma njivwa mina kwukiyandi.
Kwondu
mbundi yetinja vat kwagalalaa apma vat kwo yetigiyandi. ¹² Njambwi nyan God apma vat yetiga
nimba kat viga ligandi. Viga liga ndi kat wagalanjeya nyaangit ndi wuka ligandi. Kavle vat yetiga nimba kat God kai waligandi.
waa tamba piliwutndi.

APMA VAT YININ MAA NIN KAT SIGA VIYAN-JEYAN NDINA MALA

¹³ Apma vat mina yiga yetingweyan nimba sakwat nimba ana ngwuk kat siga viyaigandi.
¹⁴ Apma vat yetingwuk, kita nyan ngwuk kat siga viyandeyan ke yelavikngwa. Apma vatna. Nat nimba kat ke vaaka lingwa. Nin kat siga

viyaigandi waa ke yelavikngwa. ¹⁵ Kraist kat mina maawupmba yelavika ali ngwula. Ngwuk kat viga ligiyandi. Kraist nina njambwi nyan vla ligandi waa awa ngwula. God ngini nin kat apma vat yigiyandi waa yelavikngwa vak kat kavle nyan ngwuk kat wagalandeyan ndi kat ambuk ngwula. ¹⁶ Ndi kat ke nimamba njika waa kavle vapmba ke yelavika yetingwa. Nin kavle vak ana yinin waa yelavikngwuk maa kavle nimba vilaa ndi Jisas Kraistna mbaapmamba liga kavle vak yiliga nimba ndi waa njitnjeyan ngini njitnja nyaangik kat yelavita wup yigiyandi. ¹⁷ God nimba vilaa ngwuk kat siga viyanjeyan apma vatna. Kavle vat yiga yetingwa vak kat vilaa ngwuk kat siga viyanjeyan wan kavle vatna.

NINA KAVLE VAT SILIMBWIVAT KRAIST KIYANDI

¹⁸ Kraist ngwuk kat tiga kiyandi. Ngwutna kavle vak kat silimbwivak kita njambi kiyandi. Ngwukkat kwutaa Godnanala kita tingwangat ngwuk kat Jisas wundumbuyindi. Ndi ndina mbangimba tiga kiyandi. Ndina mbangi mina kiyandi. God ndina wundumbu kat njivwa kwindi. ¹⁹ Kwindi maa ndina wundumbu tamba kiyala kalabusmba la nimba kat yiga wan apma nyaangit mbutindi. ²⁰ Wan kiya nimba Noa la njimblamba ta kiya nimba ndi. Noa nima njaambit kwukna njimblamba ta kiya nimba ndi. Ndi tamba God waa nyaangit ana wuka lindi. God ndi kat asik ana sindi. Ndi mandip maawut anagandi yelavikiyaa waa yelavika kawiga tindi. Noa wan njaambit kwutndi maa sila kuvuk nimba wuleilaan lindi. Nat nimba aywaa ngumba kigiyatndi. ²¹ Wan njaambit Noa kwutndi

maa ngumba wiyalा wokendi. Wokendi, wan njambitmba wuleilaa la nimba ana kavle yindi. Kwo lindi. Mbambala ngwuk kat yagunja ngu tamba la ngu vla ligandi. Ngu yagulaa kwo linja vla kwo ligangwuk. Mbangina kisik njangivak ngu ana yagu ligangwuk. Ngini God wuna maawut kat kwunatndi maa yetigiyowun God kat walaa ngu yagu ligangwuk. Jisas Kraist kiyalaa liga laatnda vla ngwuk ngu yagulaa wupma laataa apma vat yiga yetiligangwuk. ²² Jisas Kraist nyinangwut wokelaa Godnana yaagindan naangimba ndaa ligandi. Ndaa liga enselogwi nyinangwupmba liga bnjambwi nimba kat viga tigandi.

4

MANDIP VAPMBA YETI NGWULA

¹ Kraist kat siga viyandi, ndina mbangi kangit yindi. Yinda vla nino yigiyaniń waa yelavik ngwula. Kan kipmana kavle vapmba yiga yetilapman yineyan nat nimba nina mbangi siga viyaigandi. Ngwuk kat siga viyandi maa nin apma vat yetiliga nimba nin waa yelavika yetigiyangwuk. ² Yiga liga kan kipmamba yetingwan Godnana yelavita vapmba yelavika yeti ngwula. Kan kipmana kavle vapmba ke yelavika yetingwa. ³ Tamba God kat kai wala nimba yiga yetinja vla yilingwuk. Mbambala wupmba ke yetingwa. Ndi kavle vak yiga yetindi. Ndi sik yambisik kwuka yetindi. Ndi nima sakwat nima ngu kiginda kiga kavle savle yetindi. Ndi kavle vapmba kavle waagan kat kwunaka yetindi. ⁴ Tak ndinogwinana yetingwa kavle vak kat kai wangwuk maa vilaa ngipaliga ndalaan ngwuk kat

njitigandi. ⁵ Ngwuk kat njitinja kavle vak kat God ndi kat ngini wagalala sigiyandi. Kiya nimba tiga nimba kat yiga yetinja kavle vak kat God siga nagugiyandi. ⁶ Tak kiya nimba kat Kraist ndi yiga wan apma nyaangit ndi kat mbutindi. Ndi kipmamba kwo liga kiyandi. Ndu lagwa aywaa kavle vak yilaa kiyanja vak vla ndino kiyandi. Ndi mandip maawut yelavitaa God yeta apma vak vla yetinjangat wan apma nyaangit Kraist ndi kat mbutndi.

GOD NGWUK KAT KWINDA NJIVWA NJWULA AGWUT NGWULA

⁷ Kipma nyinangwut ngiligiya njimbla sivla ana li. Tamba tambi kaligali. Ngwuk yigumba vi ngwula. Tagula maawutmba yelavika yeti ngwula. Wupma yetingweyan God kat wagalangweya nyaangit God wukiyandi ngwula nyaangit. ⁸ Yiga yetingweya kita vat nima vatna. Kan vat kingwiyan. Nat nimba kat nima maawupmba yelavika yeti ngwula. Ndi kat nima maawupmba yelavika yetingweyan kavle vat yiga yetinjeya vak kat ana yelavikiyangwuk. ⁹ Nat nimba kat ngwula ngayat kiyalaa kiga yagwega ali ngwula waa awa ngwula. Ndi kat kiginda kwivak kat kai waa ke waa. ¹⁰ God ngwuk kat kwinda mandip mandip njivwa wan njivwa nat nimba kat kwunapmak ndina kwondumba agwuk ngwula. ¹¹ Nyaangit mbutiga vat ngwula njsvwa kingiyan ndi waa God ngwuk kat wandeyan God waa nyaangit nat nimba kat awa ambuk ngwula ndi kat. Nat nimba kat kiginda kwiliga vat ngwula njivwa kingiyan ndi waa God ngwuk kat wandeyan God ngwuk kat kwiya avamba nimba agwuk ngwula.

Njivwa wupma kwut^{ing}weyan nat nimba ngwuk kat vilaa waigandi. Jisas Kraistna mbaapmamba tiga nimba ndi apma njivwa kwuka ligandi. God ndi kat apma vat kwunatndi. God apma nyana waa waigandi. Wupma wanjeyan wovuna. Awa luwa ndi njambwi nyana. Ndi nima kwonduo liga nyana. Nima nyanat tinda vat ana ngiligiayandi. Njimbla njimbla tigiyandi.

*KRAIST KAT KAVLE VAT YINJA VLA NGWULO
NGWUK KAT KWUPMA KAVLE VAT YIGIYANDI*

¹² Wuna ali nimba ngwuk. Nima kavle vat ngwuk kat yandi maa ke ngipali wangwa. Wan kavle vak nat nimba kat ana yalindi waa ke yelavikngwa. Nat nima sakwat nimba kat yiligandi. Wan kavle vat yandi maa maawupmba yelavika lingwa apma vat ke kwagalangwa. Kwutaa ali ngwula. ¹³ Kavle vat yandi, ngwuk solat siga yelavika ali ngwula. Nⁱna njambwi nyan Kraist kat kavle vat yilinja vla nin kat yiligandi waa yelavika ali ngwula. Wupma yelavika tingweyan ngini njambwi nyanat tiga ngega yandeya njimbla ngwuk kat apma vat yindi maa ngwuk solat siga tigiyangwuk. ¹⁴ Nat nimba ngwuk kat vilaa ngwuk Kraistna kavle nimba ngwuk waa njika wanjeyan ngwuk solat siga ali ngwula. Njika wanja vak wutaa Godna apma waagan ninamba tiga nin kat apma vat kwindi waa yelavigiyangwuk. ¹⁵ Nat nimba kat siga viyaga, nat nimbanza nda sikuwa, kavle vat yiga, mandip mandip kavle nyaangit ngambungwuk maa ngwuk kat siga viyanjeyan apma vat ana ndi. Kavle vatna yingwa. ¹⁶ Kraistna mbaapmamba

tingwan nat nimba ngwuk kat siga viyanjeyan kavle vat ana ndi. Apma vatna yingwa. Ngwutna mbangi wup ke yingwa. God kat awa ngwula. Nin Kraistna nimba nin. Apma vatna nin kat yima waga God kat sivu agi ngwula.

¹⁷ Kavle vak yaiga njimbla mbambala. Godna nimba nin tak nin kat kavle vat yaigandi. Nin kat yalaa God waa apma nyaangit wupmak kat kai waa tiga nimba kat nima kavle vatna yaiga. Kindi kavle nimba kavle nglei yigiyandi. ¹⁸ God waa nyaangit tamba piliwukna nyan ndino kupma piliwutndi.

God apma nimba kat kavle vak yalandi walaa
 nima
 njivwa kwutinda. God kat kai waga kavle vat
 yiga
 yetiliga nimba kat wupma ana waigandi. Kavle
 vat
 ndi kat yaigandi.

waa tamba lavu nyingamba piliwutndi. ¹⁹ God wandi maa nimamba ngwuk kat siga viyanjeyan ke yelavikngwa. Apma vat mina yiga yetiga God nin kat kwutndi. Nin kat kwunak kiyandi waa yelavika yeti ngwula. Ngwuk kat kwunakiyowun waa wandi God. Ndi woseka waliga nyan ana ndi. Vak klagemba waliga nyana.

5

GODNA SIP SIP VLA LI GANGWUK

¹ Wun samat nyaangit kiki liga ngwutna njambwi nimba kat kwivat tigowun. Wuno Kraistna mbaapma nimbara njambwi nyan wun. Kraist kiyanda vak wuna minimba viwun.

Ngini Kraist ngega yalaa ndina mbaapma nimba kat kwindaya apma nda wuno klaigowun.

² Ngwuk kat wowun. Viga tingwa nimba ndi sip sip vla ligandi. God wandi maa ngwuk sip sip viga liga nimba vla ligangwuk. Nat nyan ngwuk kat Godna sip sip kat viga ali ngwula waa wandeya vapmba mina ngwuk ke kwukngwa. Ngwutna maawupmba yelavika wan njivwa agwuk ngwula. Wupma yilingwangat God ngwuk kat woviyaguga ttigandi. Wenga klavat Godna sip sip kat viga livat kwuttingwa njivwa mina ke kwukngwa. Wan njivwa apma njivwa Godna njivwa kwo kwukiyowun waa maawupmba yelavitaagwuk ngwula. ³ Viga lingwa nimba ndi nima vak ke yingwa ndi kat. Apma vat yetingweyan yetingwa vak kat vilaa ndino apma vat yetigiyandi. ⁴ Wupma yingweyan ninja njambwi nyan ngega yalaa ngwutna si kwutaa katsoga ngwuk kat apma wenga kwigiyandi. Kwindaya wenga njimbla njimbla tigiyandi.

NAT NIMBANA NYAANGIT AWUK NGWULA

⁵ Ngwuk kwandi nyangu njambwi nimbana nyaangit awuk ngwula. Ngwuk aywaa awat sowat nat nimbana nyaangit wuka ndina njivwa akwuk ngwula. Tamba la nyan lavu nyingamba Godna nyaangit kapma piliwutndi.

Nin apma nimba nin waa kwundimba kwo waliga
nimba kat God ndi kat kaiwaligandi. Nat
nimbana nyaangit wutiga nimba kat God ndi kat
awagapma apma vat kwiligidhi.
waa tamba piliwutndi. lavu nyingamba.

6 Avla ngwutna si viyesandalaa nima nyan God waa nyaangit awuk ngwula. Wupma yingweyan ngini God ngwula si kwutaa katsogiyandi. **7** Nima maawut yelavika tingwa vak God kat ambuk ngwula. Wutaa ngwuk kat kwunakiyandi. God ngwuk kat nimamba yelavika tigandi.

8 Ngwuk yigumba viga yeti ngwula. Ngwuk kat kao yiliga maama nyan Seten ngwuk kat kao yivat yiya ligandi. Ndi kwapimba yetiga “laion” vla tigandi. Yi yaga nima kwundi waga kita nyan kat valilaa kivat yi ya ligandi. **9** Maawupmba yelavika kwutaa lingwa vak ke kwagalangwa. Seten kat kai awa ngwula. Ndi yalaga ngwuk kat nima vat kavle vak kwindeyan ke nima yelavikngwa. Ngepma ngepmamba tiga ngwula kita mbaapma nimba kat kavle vat ndino wupma yaligandi. Viga ligangwuk. **10** Nat nimba ngwuk kat kavle vat yilinja vat sivla ana tigiyandi. Samat tiga ngiligiayandi. Ngilindi maa God ngwuk kat kwunakiyandi. God nin kat awagapma apma vat yiligid. Nin kat waligandi. Kraistna mbaapma wuleilaa ndinogwiona apma vat njimbla njimbla tigiyangwuk waa waligandi. Ngwuk kat tagula maawut kwiga ngwuk kat kwondu ava kkwigiyandi. **11** Godna kwondu njimbla njimbla tigiyandi. Ana ngiligiayandi.

NGININA NYAANGIT

12 Kan nyaangit Silvenes kat mbukwun maa lavu nyingamba piliwutndi. Ndi nina kita mbaapmamba tiga apma nyana. Ngwutna maawut kwunapmak kan apma nyaangit ngwuk kat kwigowun. Kan nyaangit ngwuk

kat piliwutnda nyaangit Godna nyaangitna. Wan nyaangit wutaa nimamba kwutaga ali ngwula.

¹³ Babilon walinja ngepmamba tiga Godna mbaapma nimba ngwuk kat apma nandinya waligandi. Ndino ndi kat God yagwa ngwula wandi maa ndina mbaapmamba wuleindi. Wuna nyan vla liga nyan Mak ndino ngwuk kat apma nandinya waligandi. ¹⁴ Ngwuk aywaa ngwula mbaapma nimba kat taamba agwuk ngwula. Taamba kwukngwa vak kat vilaa nin kat woviyagu ligandi waa waigandi. Ngwuk Kraistna nimba apma maawutmba yetingwangat wowun.

GOD WAA NYAAGI
The New Testament in the Iatmul Language of Papua
New Guinea
Nupela Testamen long tokples Iatmul long Niugini

Copyright © 1975 Bible Society of Papua New Guinea

Language: Ngepma Kwundi (Iatmul)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-12-13

PDF generated using Haiola and XeLaTeX on 11 Nov 2022 from source files
dated 9 Oct 2020

b9b92e46-2e7b-584e-a145-60c7cfcc1e68